

文氏五家集

詳校官中書臣陸湘

侍讀臣孫球覆勘

總校官檢討臣何思鈞

校對官庶吉士臣潘庭筠

謄錄監生臣薛振基

欽定四庫全書

文氏五家集卷十

明文肇祉撰

錄事詩集

四言古詩

悠悠厥初篇述祖德也

悠悠厥初爰自西伯以謚為氏系用以翼漢有蜀守聲
名洋溢學校聿修民沐其澤若晉儒林文學藉藉有唐

節義光于史冊 維指使後歷世徵庸宋至寶祐篤生
信公義盡仁至大顯貞忠迨我始祖宋咸淳中宣教衡
州是為衡宗衡岳廬陵譜牒寔通 衡山之麓迺世其
族金紫大夫猶食宋祿載世元季廼易武服佩金虎符
武昌振肅國兵既下鎮遠繫獄赦長千夫戎勲備錄
長子驍健入侍高皇剪平偽漢特被寵光賜名錫
服厥族用彰時八世祖從兄平揚職充散騎徙居蘇杭
蘇之有文寔自衡陽 我祖存心占籍長洲皇矣涑水

敷教優柔甲科繼起思渥寵褒牧伯中丞世濟其休顯
顯祖考作德好修薦修國史翰苑名流 我父是承世
德克存南北二雍桃李盈門嗟予寡陋宿好是敦述此
祖德貽我子孫

悠悠厥初五章章十二句

魏魏岱山 登泰山觀日出也

魏魏岱山五岳之宗蟠九百里上有秦封 魏魏岱宗
元君有宮俯視下邑鳧繹龜蒙 載登天門層巒蔽空

秦觀在西日觀其東梁父左控石閣右通 載登高峯
憇于石室卧聽松濤夜觀日出蓬瀛海島周覽惟悉
瞻彼同巖羣仙並列叩彼金童授我寶訣金泥玉簡終
莫能詰 載登載瞻身若羽化骨異玄丘思旋其駕迴
觀其巔誠小天下

魏魏六章二章四句四章六句

壬戌之秋 游西山也適符蘇公游赤壁之期

壬戌之秋七月既望薄言西山于邁以往我懷蘇公寔

可景仰歲月日時適值其當有酒有肴以詠以唱載遨
載嬉幽情思暢卧聽泉流枕看月上四山寥寥形骸放
浪赤壁之游曷足多讓今之視昔不無慨悵

壬戌一章章二十句

神禹篇 頌大中丞南充王師督漕也

神禹治水天地平成觀河思績功莫與爭維我王公邦
國之楨漕河之命厥任匪輕決之排之以經以營䟽之
鑿之由地中行國脉以宣國計其盈惟我中丞赫赫厥

聲粒我蒸民民咸用情惟予小子頌德維誠

神禹一章章二十句

晨風篇 送虞部楊汝大奉詔南征也

晨風飄飄王事于適子之往矣我心慆矣 將子何徂
王事敦我中心搖搖孰念其瘁 莫非王事毋為忉忉
既曰仕矣遑恤其勞 子謂何求王事靡執余諒子心
子亦何憂

晨風四章章四句

肅肅篇 送侍御吳明卿印馬于齊魯地也

肅肅王命吉日于征左右陳行我馬其騁 有馬駟
駟在齊之垌維騂維黃有驪有青 有馬駟駟在魯
之林如騅如雲蹻蹻駸駸 有駟其駟夙夜在公我
職斯稱我馬既同 駟彼乘駟夙夜于外式遄其歸
載言載會

肅肅五章章四句

樂府

賡有明饒歌鼓吹曲六篇

饒歌作于黃帝岐伯以揚德建威風敵勸士也漢魏
吳晉諸臣代有作者而唐柳宗元準漢曲篇數用魏
晉義為唐饒歌十二篇一皆揄揚其祖宗之功能亦
雅頌之流亞也至於我朝陶學士安作大明饒歌三
闋嘉靖初袁督學襄亦倣為皇明饒歌十三篇皆以
稱頌高皇放勲宏德之盛茂以加矣愚生也賤敢效
唐臣合紀高祖太宗之美而賡歌之援舊題以成新

曲共成六章擬之雅頌非曰能之而施之後日歌以
為容不亦幸歟

聖人出

漢古辭也我高皇帝起自臨濠而奄有天下誠不世
出之聖謹用其題以賡歌之

聖人出六龍飛天眷德起濠西撥亂反正天與人歸掃
前元正綱維都建業式九圍復自古帝王之區奠萬古
帝王之基

定武功

魏繆襲國初破鄴而作謂武功之定始於此也高皇
渡江取太平諸路武功亦定于是

定武功始渡江江水茫茫鼓聲鋒鋒下采石平淮揚東
收吳越西定湖湘中原河洛恢其疆秦晉燕趙咸歸降
鎮南粵來越裳武功定兮殺伐張廣輪撫兮歌元良

伐烏林

吳韋昭頌魏武克敵也我皇祖驅殘敵而元君自烏

林奔于漠北亦用舊題而歌焉

我師驅故元直抵漠北境王旅奮義威宵奔絕形影太
白冥天狼淨戰壘無復存烽烟竟全屏全師奏凱旋踴
躍踰燕領萬載慶昇平中土永寧靖

宣輔政

晉傅玄以其主網羅文武之才定二儀之序也高皇
之命將出師盡得死力其一時人才如徐常輩豈晉
魏諸臣所能及其萬一哉

輔政資多賢俊又在官使我皇善任才文武咸願仕多
士起濠城四方亦戾止功成歌皇風萬國皆遵軌自古
得士心誰復能如此

應帝期

繆襲言文帝以聖德受命應運期也成祖文皇
帝順天撫運而繼志述事之大殆有光於先烈
者歟

於昭文皇光承洪緒密運神機奠鼎燕冀天縱文武一

怒安民兩京並峙內撫輿圖外扼關塞以握要幾以據
全勢

攄武師

韋昭言大烈之震天下我文皇之天縱神威廓清華
夏武師之震不有甚于吳哉

攄武師威加四海奮雄圖大畏小懷民迺蘇廓清中土
功不可踰風聲丕冒如唐虞季犁已討古剌羣趨明明
天子頌往古疇與俱